

CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E ORDENACIÓN UNIVERSITARIA E O CONCELLO DA GUARDA PARA A REALIZACIÓN DAS OBRAS COMPRENDIDAS NO PROXECTO "REFORMA DA CUBERTA DO PAVILLÓN DO CEIP AS SOLANAS - NICOLÁS GUTIÉRREZ CAMPO (A GUARDA)"

Pontevedra, 3 de maio de 2016

REUNIDOS


Dunha parte, , na súa condición de conselleiro de Cultura, Educación e Ordenación Universitaria, en virtude do seu nomeamento mediante o Decreto 15/2015, do 9 de febreiro, no exercicio das atribucións que lle confire o artigo 34 a Lei 1/1983, de 22 de febreiro, reguladora da Xunta e a súa Presidencia, e o artigo 3 do Decreto 4/2013, do 10 de xaneiro, polo que se establece a estrutura orgánica da Consellería de Cultura, Educación e Ordenación Universitaria.

Doutra, , na súa condición de alcalde do Concello da Guarda, no exercicio das competencias que lle atribúe o artigo 21.1.b) da Lei 7/1985, de 2 de abril, reguladora das bases de réxime local.

Ambas partes recoñécense a capacidade legal necesaria para formalizar este convenio de colaboración, consonte os principios de colaboración, cooperación, coordinación e eficacia que deben presidir as actuacións das administracións públicas, e

EXPOÑEN

I. A cuberta do pavillón deportivo do CEIP As Solanas - Nicolás Gutiérrez Campo (A Guarda) presenta unha serie de deficiencias que esixen acometer unha actuación de mellora que permita a súa operatividade en condicións de seguridade para a comunidade educativa así como a súa utilización, fóra do horario lectivo, polos colectivos da poboación do entorno.




Para acadar a plena operatividade desta instalación deportiva resulta necesario realizar unha serie de obras consistentes na reforma integral da cuberta, así como a substitución da carpintaría acristalada e do portal de acceso. Deste xeito a infraestrutura permitirá a mellora das condicións para impartir a materia de educación física e para as actividades deportivas do alumnado do centro así como a súa utilización fóra do horario lectivo polos clubs, asociacións e poboación en xeral do concello nos termos establecidos na cláusula sexta deste convenio.

Estas actuacións ascenden á contía de 154.000 euros en concepto do investimento nesta instalación deportiva de titularidade municipal e uso educativo e deportivo. No actual contexto de austeridade orzamentaria este importante desembolso económico non se pode levar a cabo sen a colaboración administrativa entre as administracións implicadas: a Consellería de Cultura, Educación e Ordenación Universitaria e o Concello da Guarda.

II. O Concello da Guarda ven prestando unha especial atención na promoción de toda clase de deportes, colaborando coas entidades, asociacións e clubs do concello na construción e remodelación de instalacións deportivas, coa finalidade de garantir ás persoas usuarias a práctica deportiva nunhas condicións adecuadas, de modo primordial orientadas ao deporte de base da poboación en idade escolar.

III. Os convenios entre as administracións públicas constitúen o instrumento adecuado para desenvolver a súa cooperación en cuestións de interese común, tal como establecen os artigos 6 e seguintes da Lei 30/92, de 26 de novembro, de réxime xurídico das administracións públicas e do procedemento administrativo común, 57 da Lei 7/85, de 2 de abril, reguladora das bases de réxime local e 198 e seguintes da Lei 5/97, de 22 de xullo, de administración local de Galicia.

IV. A lexislación de réxime local establece como unha das competencias propias dos concellos a promoción do deporte e instalacións deportivas e de ocupación do tempo libre, así como a conservación, mantemento e vixilancia dos edificios de titularidade local destinados a centros públicos de educación infantil, de educación primaria ou de educación especial. Para estes efectos, e co fin de posibilitar a súa consecución real e efectiva,



instrumentase este convenio dirixido ao cumprimento das obrigacións impostas pola normativa vixente.

En virtude do exposto, ámbalas dúas partes acordan a subscrición do presente convenio de acordo coas seguintes

CLÁUSULAS

Primeira. **Obxecto**

O obxecto do presente convenio é articular as bases de colaboración entre a Consellería de Cultura, Educación e Ordenación Universitaria e o Concello da Guarda para levar a cabo as obras do proxecto de "Reforma da cuberta do pavillón do CEIP As Solanas - Nicolás Gutiérrez Campo (A Guarda)".


Segunda. **Orzamento**

O importe destas actuacións ascende a contía de 154.000 euros (IVE incluído). Desta cantidade 150.000 euros corresponden á execución da obra, que comprenderá todos os gastos que derivan dela, incluídos os da dirección e de seguridade e saúde.

A cantidade restante de 4.000 euros corresponde ao custo da redacción do proxecto.

Terceira. **Financiamento**

A Consellería de Cultura, Educación e Ordenación Universitaria asumirá a redacción e aprobación do proxecto técnico con cargo aos seus orzamentos.



A realización das obras será financiada a partes iguais pola Consellería de Cultura, Educación e Ordenación Universitaria e o Concello da Guarda, de acordo coas aportacións que se indican:

Institución	Importe	Aplicación orzamentaria
Consellería	75.000	10.10.422A.632.1
Concello	75.000	2016.0323.750


Se na fase de execución da obra os custos contemplados nesta cláusula resultan incrementados, as partes financiarán dito incremento na mesma proporción na que participan.

Cuarta. ***Obrigas da Consellería de Cultura, Educación e Ordenación Universitaria***

A consellería contratará a redacción do proxecto por un importe máximo de 4.000 euros e levará a cabo a licitación, dirección, execución e recepción das obras incluídas no proxecto técnico, que non poderán superar a contía de 150.000 euros.

A consellería asumirá o custo do proxecto e a metade do custo da obra con cargo ao crédito desconcentrado na Xefatura Territorial de Pontevedra, e quedará obrigada a destinar os fondos percibidos do Concello da Guarda ao financiamento do obxecto deste convenio, recollido na súa cláusula primeira. Igualmente, nas súas relacións co Concello da Guarda, deberá atender ao cumprimento das estipulacións contidas na Lei 9/2007, de 13 de xuño, de subvencións de Galicia (LSG) e ao seu regulamento de desenvolvemento, aprobado por Decreto 11/2009, de 8 de xaneiro, en particular no que se refire á xustificación das subvencións. Conforme ao establecido na lei 38/2003, de 17 de novembro, xeral de subvencións, deberase proceder á publicación na Base de Datos Nacional de Subvencións.

Unha vez finalizadas as obras procederá á súa entrega ao Concello da Guarda, mediante a formalización da correspondente acta na que se consignará o investimento realizado e os aspectos necesarios para a súa inclusión no inventario correspondente.



Así mesmo, comprométese a que esta instalación poida ser destinada ao uso xeral para actividades deportivas ou culturais que se organicen fóra do horario lectivo nos termos da cláusula sexta deste convenio.

Quinta. ***Obrigas do Concello da Guarda***


O concello porá a disposición da consellería o pavillón deportivo do CEIP As Solanas - Nicolás Gutiérrez Campo coa finalidade de levar a cabo as obras previstas no proxecto e concederá as autorizacións que fosen precisas.

O concello financiará a metade do custo da obra mediante a achega das cantidades correspondentes. Esta achega constitúe a concesión dunha axuda pública á consellería, compatible coa percepción doutras subvencións, axudas, ingresos ou recursos para a mesma finalidade, procedentes de calquera administración ou entes públicos ou privados, nacionais, da Unión Europea ou de organismos internacionais, co límite de non superar, illada ou en concorrencia con outras axudas, subvencións, ingresos ou recursos, o custo da actividade subvencionada. A confluencia de competencias de distintas administracións dentro do mesmo espazo físico e os intereses públicos, sociais e económicos implicados imposibilitan a concorrencia competitiva no procedemento e determinan o seguimento dos trámites de concesión directa previstos na Lei 9/2007, de 13 de xuño de subvencións de Galicia (artigos 19 e 26).

Como requisito previo a licitación da obra e no prazo máximo dun mes dende a sinatura do Convenio, o aboamento da aportación do Concello, na cantidade sinalada na cláusula terceira, farase efectivo á Consellería de Cultura, Educación e Ordenación Universitaria, mediante ingreso na conta xeral da Xunta de Galicia, c/c. ES82 2080 0300 8731 1006 3172 indicando o concepto e referencia do Convenio.

Corresponde ao concello asumir o mantemento e a conservación das instalacións deportivas reformadas dende o día seguinte ao da formalización da acta de recepción das obras.

Sexta. ***Condicións de uso das instalacións deportivas***



As instalacións deportivas do CEIP As Solanas - Nicolás Gutiérrez Campo obxecto das actuacións previstas neste convenio poderán ser abertas ao **uso xeral** da poboación fóra do horario lectivo **para fins educativos, deportivos e culturais** sempre que non se interfira na programación das actividades do centro e que se garanta a súa correcta utilización. A consellería e o concello acordarán as fórmulas de colaboración que permitan a efectividade desta cláusula sempre nos termos e condicións previstos no Convenio marco de colaboración entre a FEGAMP e a consellería sobre o uso de instalacións deportivas de titularidade da consellería subscrito o 16.10.2014.

Sétima. ***Comisión de seguimento e control***

Créase unha comisión mixta de carácter paritario entre as dúas institucións asinantes para o seguimento e control do cumprimento deste convenio e para propoñer a resolución das dúbodas de interpretación e das controversias derivadas da súa execución. A comisión estará integrada por tres persoas en representación da consellería e outras tres en representación do concello. A presidencia corresponderá a unha das persoas representantes da consellería. Esta comisión reunirase no prazo de tres días contados dende a petición expresa de calquera das partes.

Oitava. ***Vixencia do convenio***

O presente convenio entrará en vigor na data da súa sinatura e terá vixencia ata o 31 de decembro de 2016. A vixencia do presente convenio poderá prorrogarse coa conformidade expresa das partes intervenientes no caso de que non se rematasen as obras previstas nel.

Novena. ***Resolución***

Será causa de resolución o incumprimento das obrigas derivadas deste convenio.

Décima. ***Xurisdición***

O presente convenio ten natureza administrativa. As partes quedan sometidas á xurisdición contencioso-administrativa, a falta de entendemento previo pola comisión citada na cláusula



galicia

sétima, para a resolución das posibles controversias sobre a interpretación e o cumprimento do convenio.

En proba de conformidade con canto antecede, asinan este convenio por triplicado exemplar no lugar e data arriba indicados

Pola Consellería de Cultura, Educación
Ordenación Universitaria

Polo Concello da Guarda